

會長的話

戚嘉慧(傑)

每逢佳節倍思親，執筆之時已是中秋前夕。而我的父母身居香港，對他們的思念，真非筆墨可以形容。今年十一月在台山培正舉行的世界培正同學日，我打算帶着爸媽一同前往慶祝，除了讓他們看看我們培正紅藍兒女的優越及成就，更想讓他們知道，當初他們送我和弟弟入培正唸書，絕對是正確的選擇。各位學長要是還在猶豫去不去台山，還是早點聯絡旅行社吧，機票可緊張呢！

不過回去台山前，請踴躍參加我們十一月三日在三藩市康年酒家的同學日，今年我們回復KARAOKE，請各位唱將帶備光碟，唱個痛快。我們今年還有抽獎，若然抽中頭，二或三獎，隨時帶著新I-PAD 或者I-POD 去台山旅遊也不一定。

說到台山旅遊，我要代表鄭文熾大哥多謝我們熱心的學長們的捐贈，年初我回香港時，已代三藩市培正同學會贈予黃啓明校長紀念堂基金HK\$15,000。所謂集腋成裘，各位學長可以將捐款寄到我們財政李 健同學(Connie Hui, 20 Santa Ana Ave, San Francisco, CA 94127) 抬頭SFPCAA，備註：黃啓明校長紀念堂。

我本人在此感謝這一年中，在春茗，夏季郊遊及梁錦琪學長乒乓球日中幫忙的理事和非理事們，多謝您們無私的幫忙，發揮我們培正的紅藍精神。

有那一位學長有興趣出任理事，請與我聯絡。不過“革命尚未成功，同志們仍需努力”。同學日再來發揮我們的幹勁吧。懇請各位學長到時來見證，給予我們意見及鼓勵。十一月三日見。

國名謎答案

- | | |
|----------|----------|
| 1. 尼泊爾 | 16. 敘利亞 |
| 2. 海地 | 17. 菲律賓 |
| 3. 蘇丹 | 18. 朝鮮 |
| 4. 蒙古 | 19. 秘魯 |
| 5. 湯加 | 20. 關島 |
| 6. 索馬里 | 21. 南非 |
| 7. 馬其頓 | 22. 保加利亞 |
| 8. 匈牙利 | 23. 荷蘭 |
| 9. 芬蘭 | 24. 瑞士 |
| 10. 也門 | 25. 黎巴嫩 |
| 11. 日本 | 26. 希臘 |
| 12. 阿富汗 | 27. 新加坡 |
| 13. 馬來西亞 | 28. 蒙古 |
| 14. 以色列 | 29. 危地馬拉 |
| 15. 智利 | 30. 塞舌爾 |

2012年夏季郊遊後記

黃維廉(光社) 林潤棠(銳社)

戚會長在郊遊前，約我寫篇稿。但係，被我婉拒咗。

7月27日，收到她的回覆電郵。全文如下：“明白。明天不必勞心，玩開心點便是。明天見。戚嘉慧”

“卸膊”非我之原本心意。實在係有原委的_____

因今次郊遊，廣州培正銳社美西分社有三位係第一次參加。一位，係剛從西雅圖退休南遷回加州灣區定居，98年大家曾聚會過，十四年後嘅今天，相約係郊遊時重逢。另兩位，係從羅省嚟嘅兩夫婦，佢哋特意留低參加呢次活動。大家該會理解我哋銳社呢次郊遊嘅特殊性，體諒我難以抽身四圍去攞料寫稿，實非有心托會長手躄。

從會長回文可見，佢係多麼通情達理，關心備至。我更是如釋重負。豈料，二十幾天後，她橫手一掌，將呢個美差又輕輕推翻到我嘅膊頭。嘉慧會長真係挑通眼眉，睇準瞄實我現時賦閒在家，冇理可推。

講句實在話，同學會嘅事，係大家嘅事。有理事會牽頭，大家夾手夾腳，齊齊跟上，人人團結，永不分化，同學會呢個大家庭，便將會永存溫暖，興旺壯大也。我又豈能袖手旁觀呢！惟有揸起支筆，盡力而為之。因冇攞到料，只好炒啲冷飯，望大家見諒。

相對一年後嘅今時，美國野火狂燒，大地干裂，玉米產量將大幅失收。環繞太平洋各國，狂風暴雨，洪災氾濫。歐洲大陸，除高溫干旱，嗰個“風暴”就更係揪人之心.....然而，加州嘅 Blackberry Farm 同往年一樣，仲係咁風和日麗。Sunshine on my shoulders.....

理事們同一班義工，早早就到場，張羅各事。戚會長，到處上下打點，未見她面有愁容。你或會奇怪，她為何發愁？話你知一條小道消息：係將要截止報名時，報上嘅人數不足50人。點唔到會長佢擺擺攞攞，于是乎，打鑼咁搵人。當我知道呢個情形時，就心想，據多次參加郊遊，都係老嘢居多。老人家做嘢梗係慢半拍，對參加野外活動，因為身體健康因素，多數係係兩三日先至能夠落實，急都無用。

果然，據當日報名處再三核實，今次參加活動嘅總人數，剛好100人。真係百人好合也！但係年齡結構，就如細個時玩嘅“定螺”咁樣：71年至77年嘅只有9人，61年至69年 嘅有25人，其餘係60年(含60年)以上。即係話：大約70歲以下占34人，約70歲 以上共66人。

去年，我已表達了對這個問題的關注。我估計，這或者和經濟問題有關。因六十幾歲嘅人，大多還在工作， 嘅如今失業率高企不減嘅時勢下，保

住份工，係重中之重，心思自不在悠閒玩樂之中。諗到呢度，不禁為之憂心。惟有祝福壯中青代嘅校友們，能穩健咁過好呢道關。

今次，參加活動中最年長者，仲係舊年44年昭社嘅鄭乃良學長。八十幾歲老人，來自Sacramento。我想趁呢次機會，向接送他的家人，講聲“多謝！”正係有這些老學長們嘅家人嘅默默支持，同學會嘅活動，才会有六七十年嘅年齡跨度。而去年最年輕嘅04年雄社蔡弄墨學妹，今次有事冇參加。不過，她已當選為今屆理事會理事，以新生代的身份，在為大家服務呢。

各位，有冇諗翻起，舊年介紹大家用“開心功”煉後生，同理，每日飲八杯開水嘅“水功”煉容顏不易老，個位48年建社嘅曾學長？今年，佢一早就到咗，拿着去年記低我哋名字嘅<<通訊>>嚟搵我哋。他老人家，一樣烏髮紅顏。而我，已是黑髮依稀。講嚟，每日飲幾杯水有何難？難就難在堅持！我有恆心堅持，係個失敗者。在學長面前，真愧面對。

在今次活動中，有一個人，比我更關心去年郊遊報導中，因遲到而未和同級社友會面的兩位老人，佢就係鄭國輝。佢特登過嚟同我講，堅社嘅徐壽仁學長，今年又嚟咗嘞。并帶我過去探望他。學長告訴我，他身體還好，今年，可以依時嚟參加郊遊嘞。49年堅社今次有九人參加（六位學長和三位學嫂）。係社友嘅聚會和交談中，總會離不開往昔嘅陳年舊事。從佢哋嘅歡笑中，我不難睇出，在這張張已經歲月摧殘嘅蒼老面容上，依然仲透着內心個片被激發出青春嘅餘光。

每次，同學會聚過之後，我都會沉醉嚟追憶青少年時代嘅踪影，而陷入一段莫名嘅思緒。有甜，有酸，有苦，有怨，有恨，最慘嘅係有悔……

我最喜歡大家相聚之時，對大家所關心嘅共同話題，各抒己見。比如：健康問題，社會動態，中國見聞等等。不求辯到誰是誰非。只望大家，你一言，我一語，興趣盎然，樂在其中！要挑出咁樣嘅“調情”高手，則非香港培正銳社吳宣倫博士莫屬！今次，他嚟到銳社“駐地”，就直接提出：“培正中學嘅英文譯名 Pui Ching Middle School 啱唔啱？”大家都仲未醒過神，佢老兄就斬釘截鐵話：“唔啱！”于是，從校名嘅英譯談到香港培正嘅發展，從香港學制傾到大陸學制，從教育更轉到政制。活躍嘅探討，吸引咗堅社嘅曹敬儒學長過嚟參與其中。他覺得，各人所抒之見解，十分啱聽，便大聲叫他的另一位社友：“老九，老九過嚟，過嚟聽聽！”唔使問，佢哋兩個對呢類問題，梗係有過爭拗。而家叫佢過嚟，好又再詢下。只可惜，老九仲未過到嚟，“上頭”已叫大家去食餐。即將上演嘅研討會，就此叫停。實在十分遺憾。但不管如何，剛才討論嘅話題和氣氛，將近百年嘅校史和當今嘅現實揉合在一起，同學會聚會嘅現實意義，由此，可見一斑。

今次用餐，比去年又改進了。八位分餐員，一字排開係分餐桌前。領餐者，係兩旁分兩列排隊候餐。輪到你時，只需企定定，就可以領到一份有五樣菜式嘅可口美食。從容又衛生，值得堅持。（有相為証）“各位義工，

辛苦晒你哋嘞，我哋大家十分感謝你哋！”據說，他們大多是77年傑社嘅社友。而訂餐係由前會長孫必興負責（孫學長因事缺席），飯菜是何汝顯和李健兩位理事從Millbrae市的祥興海鮮燒臘餐館車過來。大家飽餐之後，反應甚佳。應記佢哋一功。

餐後，社委和義工又送來飯後菓，大伙又刨一輪西瓜，解暑又解渴。西瓜真係一種好做功夫時，又受歡迎嘅合時水菓。

今次郊遊，除影集體相之外，冇搞餘興節目。其實，對於老人家，能見趨面，再拉次手，係陽光下，于樹蔭旁，圍坐傾偈，東西南北，今昔世事，戲語霜鬢，揮灑一翻，其心足矣。

我相信，凡嚟過 Blackberry Farm 嘅人，都會鐘意呢度咁優雅嘅公園。冇嚟過嘅校友們，下次有機會時，望你唔好錯過。唔怕失禮，講比你知一處人人都關心嘅地方—— Bathroom，你若嚟過，用過，一定會同我一樣，樹起隻手指公。

有一件事，我想講下。提到要排隊，係人都會煩。今次活動，去排隊，報名登記，填寫姓名標籤，交錢，領瓶裝水（仲要寫上姓名），一連串程序要做齊。當遇到有十個八個人排住隊嚟，就有得你等。如果，撞到個性急嘅，又或者有猴急想去同老友傾偈嘅排緊隊，就更催住嚟。如果又咁啱，收銀員遇到難得一見嘅老友講多兩句，而慢咗手。咁矛盾就有可能出現。就係咁翹，今次，我見到咁嘅事。雖然係件小事，但放係邊個人嘅身上，個心都會唔多舒服。大家細心諗下，換個位又諗諗，睇睇係咪咁？講句真心說話，同學會或者各社團嘅組織，都係義務為校友服務。理事們開會食個餐，都係自己揸荷包。佢哋就係憑一顆熱心，無私為大家。大家對佢哋，就應關心，尊重和支持。以我個人嘅體會，校友們係社團嘅交往之中，有邊樣嘢，係緊要得過相互之間嘅“理解”和“包容”。願與大家共勉。



社友們 輕鬆地在輪候領餐



義工們在準備飯後菓